

02/06/2003

Melayu perlu sesuai jati diri pada era globalisasi

Dr Mohd Azam Rauzan

RANCANGAN Pelik Tapi Benar kini tiada lagi dalam senarai siaran mingguan di kaca TV. Siri popular kepada jutaan penonton itu ditarik balik siarannya atas sebab yang sudah diberikan oleh Kementerian Penerangan.

Bagi saya, Pelik Tapi Benar kalau diolah dengan penyampaian secara berilmu, lengkap dengan penerangan dan ulasan ulama, barangkali dapat mengubah mentaliti Melayu serta memberi mereka taufik dan hidayah.

Marilah kita merenung mengenai budaya orang Melayu yang berkaitan soal hal mistik, alam ghaib, jampi serapah, bomoh serta tahyul yang turut mempengaruhi jati diri mereka.

Bomoh masih satu daripada rujukan utama dalam mencari penyelesaian kepada permasalahan serta kekusutan. Tidak keterlaluan kalau saya katakan

majoriti orang Melayu masih taksud atas kebolehan 'profesional alam mistik' ini.

Lebih melucukan, ramai juga orang politik yang menggunakan khidmat bomoh untuk mencapai hajat mereka. Mentaliti jumud dan kolot ini harus dikikiskan.

Apakah ini semua sebahagian daripada nilai jati diri Melayu dalam mereka mengharungi alam globalisasi? Kalau saya katakan, orang Melayu sudah tercabit akarnya, barangkali ramai yang akan marah. Tapi apakah langsung tidak ada secebis pun kebenarannya?

Marilah kita perhitungkan apabila jati diri orang Melayu disentuh minggu

lalu oleh Perdana Menteri, Datuk Seri Dr Mahathir Mohamad. Cuma beliau menyebut karyawan budaya dan sastera antara pihak yang berperanan dalam hal membentuk dan mempertahankan jati diri.

Dalam ucapannya beliau mengiktiraf peranan karyawan dan penulis, lantas meminta mereka meneruskan tanggungjawab itu dengan menyesuaikan dengan keperluan pemodenan.

Sebenarnya sudah lama karyawan dan penulis di negara ini berusaha menanam dan mempertahankan jati diri bangsa Melayu. Cuma ramai yang tidak memedulikannya, walhal ia adalah soal pokok mengenai orang Melayu.

Apabila Perdana Menteri menyebutnya, apakah ia sudah ke tahap membimbangkan? Apakah akar keMelayuan orang Melayu sudah reput hingga semangat juang orang Melayu merosot.

Tidak dinafikan ada orang Melayu mencatat kejayaan menerusi kekentalan semangatnya seperti Datuk Azhar Mansor, Abdul Malek Mydin dan anak Johor, Shamsul Rejal Abdul Jamil yang berusaha untuk mencipta rekod dunia dengan memandu kereta nasional mengelilingi dunia.

Namun, ramai juga orang Melayu yang terpapar kisahnya bukan kerana kejayaan, tetapi mencipta nama dalam hal yang memalukan bangsa Melayu.

Sebut apa saja mengenai gejala sosial orang Melayu termasuk dalam hal berkaitan sumbang mahram, dadah, pecah amanah dan baru-baru ini, video lucu, ia berpunca daripada hilangnya akar keMelayuan.

Kini, orang Melayu pula menjadi berani dan kreatif, tetapi tidak kena tempatnya, hinggakan perbuatan yang suatu ketika dulu tidak terfikir oleh kita, kini dilakukan oleh orang Melayu.

Melayu mesti berani menolak nilai Melayu yang diwarisinya sejak turun temurun, yang tidak secocok malah bertentangan dengan ajaran Islam seperti sikap nasi secupak tidak akan menjadi segantang, berborak kosong, mengumpat, berhasad dengki, malas, kurang daya saing dan cah keting dalam berpolitik.

Ini penyakit orang Melayu. Itu semua membuatkan kita berasa bingung, mengenai masa depan bangsa Melayu. Walhal dalam keadaan sekarang, semakin ramai lahir Melayu menengah menerusi sistem pendidikan di samping kepesatan negara.

Minda Melayu sebenarnya bukan saja tertutup, malah kadang-kala mula bercelaru. Ini semua berpunca daripada cara hidup orang Melayu yang telah kehilangan jati diri serta kegagalan menyaring ajaran yang bertentangan dengan Islam.

Maka, orang Melayu perlu kembali kepada soal asas Melayunya agar mereka mempunyai jati diri dan perjuangan yang jelas.

Melayu akan terbuka mindanya dan akan hilang trauma yang menyelubungi dirinya jika mereka berpegang teguh kepada Islam dalam segala sistem akidah dan syariahnya tanpa pengecualian.

Pertama, kita kena kembali kepada agama, dengan berpegang kepada ajaran al-Quran dan hadis kerana ia adalah amalan hidup kita. Memahami prinsip Islam sebenarnya akan dapat menguatkan daya ketahanan serta membantu kita menangani permasalahan sesama manusia.

Kedua, membangunkan budaya dan kegiatan yang membawa kepada kefahaman dan kesedaran terhadap asal usul kita.

Contohnya, kegiatan seperti membudayakan al-Quran dan hadis di Johor, memberi kesan yang mendalam kepada pembinaan generasi bangsa Melayu.

Begitu juga dengan kegiatan lain seperti membangunkan zapin, ghazal dan seni mempertahankan diri seperti silat sendeng serta kegiatan riadah J-Robik yang baru diperkenalkan adalah antara strategi menyuburkan jati diri rakyat Johor, khususnya orang Melayu.

Pendekatan secara holistik ini termasuk berteraskan agama dan budaya Melayu yang diamalkan di Johor, diharap dapat membebaskan minda serta menyuburkan kebebasan berfikir dalam ruang bereksperimen yang secukupnya bagi membina jati diri Melayu. - diagnosis@johordt.com